

COMUNICATO n. 922 del 16/04/2025

S meing toalnemmen de jungen as hom zbischn de 18 ont de 29 jor ver za stitzn de alpineplatz

Jungenrot Eusalp, s hòt zait ver za schraim se inn finz as de 31 van moi

[Mòcheno] Bèttèrbècksln, s ovòll va de biodiversitet ont s òlbe mear verkear as de strosn van telder: der alpineplòtz ist noch za belln verstea' bos as men mechet tea' turch a zòmmòrbet van mearer regionen va de Europäische Union ver de Alpineregion (Eusalp), asou as de pèrgplatz kennen hert hòltn ont envire schaug. Haier aa, de jungen meing helven za arribarn en doi rif en de bèlt mear tsunt as men mu', ont mòchen toal van rot van jungen Eusalp. De jungen zbischn de 18 ont de 29 jor as lem en oa'na van regionen va Eusalp en Balschlònt, Taitschlònt, Frankreich, Osterreich, Slowenien, Schbaiz oder Liechtenstein meing vourstelln de vrog finz as 31 va moi 2025.

Der rot van jungen Eusalp ist gamòcht va 28 toalnemmer (viara ver an iatn alpinedorf) as plaim ver a jor, ont meing sai' vernaiert ver an ònders jor.

A plòttform iber de grenzn ver en empowerment van jungen

Der rot van jungen hòt a plattform asou as de jungen mein toalnemmn en òlls sèll as ist za u'stimmen van orgln van Eusalp ont versichert as sèll as de tschbinnen kimmt galisnt. De toalnemmer miasn hèlven za mòchen politik ont projektn ver de alpn as hom de bichtestn riven. De meing rotn òrbetn, projektn ont naiekaitn, vourstelln idee en de politiker van Stòttn ont van regionen as mòchen toal va Eusalp ont sensibilisiarn as de europeische ausònderkaitn va òll region. De jungen tea'se organisiaarn ont learnen za nemmen toal en de demokratische sòchen pet verschidena sprochen ont kulturn. Va de ònder sait Eusalp leart van jungen za nemmen au naia ideen van lait as barn as de Alpn lem.

Der rot trèfft se viar oder vinf vert ver òll schicht ont bail en jor der tuat zòmmòrbetn pet tematische gruppn ver za tschbinnen naia òrbetn turch telematische virtualn mittln. De jungen as sai' kemmen u'zòk miasn tschbinnen en a pahòltlege riarn se, zòmmhengen se en òndra naia òrbetn ver de jungen, òrbetn ver de zukunft van alpine regionen ont sensibilisiarn as natural ont kultural pahalter van Alpn.

Vrong finz as de 31 van moi 2025

De jungen enteressiat hom bail finz as de 31 van moi ver za u'melln se durch de sait <https://alpine-region.eu/alpine-youth/get-involved>. Der Jungenrot hòt der zil za drautschbinnen en ònderst sai' en de alpn, ver dòs bart men schau za tschernen junga kandidatn as sai' van sim Lander Eusalp noch va bou as de kemmen, mander baiber ont schoa gaòrbetet hom en organizzazionien pet de jungen. De Stòttn ont de Regionen Eusalp barn zoln de kostn van biasn ver de trèffn ont manifestazionien bou as toalnemmen de toalnemmer van Rot ont barn gem hilf ont support.

Der Jungenrot ist zuazolt van projekt Spazio Alpino Interreg "Support Eusalp" bou as ufficialet partner ist de Region Provenza-Alpi-Costa Azzurra. Zòmm en doi projekt de Region Bourgogne-Franche-Comtè ist vourstea'ner van òrbetn gamòcht ver de jungen. Ont nou en 2025 de zòmmpresidenz Osterreich/Liechtenstein va Eusalp gip an groasn bèrt ver en zòmmòrbetn pet de jungen.

Ver za bissn eppes mear:

Sito van Jungenrot van Eusalp: <https://alpine-region.eu/alpine-youth>

Informazionen as en Eusalp: <https://alpine-region.eu/>

Derzua: plakat

Ibersetz gamòcht van Sprochtirl va de Tolgamoas'schòft Hoa Valzegu' ont Bersntol

(cdt)